

四庫全書

子部

欽定四庫全書

子部

續名醫類案卷二十六

詳校官太醫院醫士臣程泰

編修臣倉聖脈覆勘

總校官編修臣

王燕緒

校對官中書臣

劉源溥

謄錄監生臣

陳箴

欽定四庫全書

續名醫類案卷二十六

錢塘魏之琇撰

遺精

孫文垣治一人色慾過度夢遺精滑先服清相火之劑
不效繼用固澁之劑亦無功求孫治與以玉華白丹
濃煎人參湯送二錢兩服後稍固兼進六味地黃丸
加蓮鬚芡實遠志五味子凡一月而愈玉華白丹鍾

乳粉白石脂陽起左顧牡蠣

李妓兩寸短澁兩尺洪滑關弦孫診之間經可行否曰
僅行一日亦點滴耳曰此脉在良家主夢遺若不宜
有也曰良然即御客時亦或遺遺則冷汗淫淫體倦
不能支不與藥或問故曰金木相勝心神無主法在
不治或謂人尚無恙何便至此曰弦為春令當金之
時猶然猖獗設在卯月木旺火相則肺金枯痿水之
上源竭矣且腎脉洪滑妓以慾勝陰血既虧淫火愈

熾陰虛則病陰絕則死今已咳嗽其兆見矣烏可治乎次年二月果死

薛立齋治朱工部勞則遺精齒牙即痛用補中益氣加半夏茯苓白芍并六味地黃丸更以十全大補加麥冬五味子而痊

一男子白濁夢遺兼腳跟作痛口乾作渴大便閉澀午後熱甚用補中益氣湯加白芍元參并加減八味丸而愈

龔子才治陳桂林秀才患夜夢遺精每月一二次或三五次遺後神思昏沈身體困倦診之六脉微瀯無力此陰虛火動之症以辰砂既濟丸加紫河車龍骨服之數月奏效奈數患不能謹守因口占里語一章以戒之曰培養精神貴節房更祛塵慮慎寒涼食惟半飽宜清淡酒止三分勿過傷藥餌隨時應勉進功名有分不須忙幾行里語君能味便是長生不老方

黃履素曰余年三十外曾患遺精龜頭時有精微微流

出晝夜常然初時驚懼特甚人身中幾許精血而堪
此涓涓不絕乎醫之高明者謂為無害但毋服瀉藥
緣病以服附子得之知是火症但涼補而勿熱補用
六味九加沙苑蒺藜兔絲子及炒黃柏少許等藥將
此病付之度外莫寘諸懷如常將理凡兩年始全愈
龍骨牡蠣等藥從未入口蓋人身中惟氣血周流斯
快暢豈可澁之使滯雖得暫效為害實深患者審之
予初有懼心及兩年間應酬如常絕無倦態豈此精

與交媾之元精不同故無大害耶

張路玉治韓慕廬季子素稟清癯宿有精滑不禁之恙
診之脉微弦而數尺中畧有不續之狀此不但腎氣
不充抑且氣秘不調致不能司封藏之令與六味九
去澤瀉加鯁膠五味畧蕪沈香於補中寓宣法雖如
此但久滑竅䟽難期速效耳

李士材治一人考試勞神患精滑小便後及夢寐間俱
有遺失自服金櫻膏經月不驗李診之曰氣虛而神

動非遠志丸不可服十日減半一月全愈

王叔權曰有士人年少覓灸夢遺為點腎腧痠疼令其
灸而愈不拘老少皆腎虛也古人云百病皆生于心
又曰百病皆生于腎心勞生百病人皆知之腎虛亦
生百病人未知也蓋天一生水地二生火腎水不上
升則心火不下降茲病所由生也人不可不養心不

愛護腎也

資生經

平江譚醫云夫遺泄尋常只治心腎未有別治以素問

仲景考之當治脾服之藥屢效用厚朴二兩

薑汁製羊

脛一兩

炭火煨過通紅取出
審殺別研細如粉

右二味白水麵糊為丸

如梧桐子大每服百丸至三百丸米湯下

集成
全上

陸祖愚治一人因作文夜深倚几而卧卧即夢遺明早

吐血數口數日後復遺復吐自此或間日或連日或

吐血或夢遺或與六味地黃湯幾百帖即加減亦不

出滋陰清火而已數月不愈口乾微欬惡風惡寒懶

于動作大便溏小便短赤脉之豁大無力沈按則駛

曰此症非得之房室乃思慮太過損其心血心血虛則無以養其神而心神飛越因有夢交之事神不守舍則志亦不固而腎精為之下遺腎虛則火益無制逼血妄行而吐上刑肺金而欬其畏風寒而懶動作者火為元氣之賊火旺則元氣自虛也其肌肉消而大便溏者思慮損其心血即是傷其脾陰也與歸脾湯二十劑遺吐遂減半又二十劑諸症俱痊百劑而精神加倍矣

繆仲淳治婁東王官壽患遺精聞婦人聲即泄瘠甚欲死醫告術窮繆之門人以遠志為君蓮鬚石蓮子為臣龍齒茯神沙苑蒺藜牡蠣為佐使凡服稍止然終不斷繆于前方加鯁膠一味不終劑即愈

趙景之太史未第時因肄業勞心太過患夢遺症已三四年矣不數日一發發過則虛火上炎頭面烘熱手足逆冷終夜不寐補心腎及瀉精藥無不用過壬申春偶因感冒來邀診視談及前症之苦為疏九方以

黃柏為君佐以地黃枸杞蓮鬚鰾膠萸肉五味車前
及麥冬之類不終劑而瘳初景之疑黃柏太寒不欲
用謂尊恙之所以久而不愈者正未用此藥耳五臟
苦欲補瀉云腎欲堅急食苦以堅之黃柏是也腎得堅則心經雖
有火而精自固何夢遺之有哉向徒用補益收澀而
未及此故難取效

立齋治王上舍遺精勞苦愈甚坳中結核服清心蓮子
飲連翹消毒散不應以八珍湯加山藥萸肉遠志十

餘劑漸愈更以茯苓丸治之遂不復作葉巡檢患此云諸藥不應盧丹谷與八味丸治之而愈

白濁

沈朗仲治王雨泉壯年氣弱溺後精水淋漓不斷服六味丸不應易八味丸反加澁痛兩尺脉數而氣口虛大此土虛不能隄水也與補中益氣加麥冬五味十

劑而痊

張氏
醫通

薛立齋治一婦人善怒或小腹痞悶或寒熱往來或小

便頻數時下白淫藥久不愈面青口苦薛以此積憤而不能發散所致用龍膽瀉肝湯而愈用加味逍遙散八珍湯間服而安

龔治一男子莖中痛出白津小便閉時作痒用小柴胡加山梔澤瀉木通炒連膽草茯苓二劑頓愈又兼六味地黃而痊

司廳陳石鏡久患白濁發熱體倦用補中益氣加炮薑四劑白濁稍止再用六味地黃丸兼服諸症悉愈

少宰汪涵齋患頭暈白濁用補中益氣湯加茯苓半夏愈而復患腰痛用山藥山萸五味草薢遠志頓愈又因勞心盜汗白濁以歸脾湯加五味而愈後不時眩暈用八味丸全愈

孫文垣治一人稟質素強縱飲無度忽小便畢有白精數點自以為有餘之疾不宜醫治經三月以來雖不小便時有精出覺頭目眩暈

此上病多由下之證驗也

醫者以固

精澁脫之劑治之兩月畧不見功診之六脉滑大此

因酒味濕熱下注精藏遂以白朮茯苓橘紅甘草乾葛白豆蔻加黃柏少許兩劑即效不十日全安

潘見所患白濁精淫淫下治三年不效孫診之兩寸短弱兩關滑兩尺洪滑曰疾易愈第待來年春仲一劑可瘳問故曰素問云必先歲氣毋伐天和今所患為濕痰下流症也而脉洪大見於尺部為陽乘於陰法當從陰引陽今冬令為閉藏之候冬之閉藏實為來春發生根本天人一理若強升提之是逆天時而洩

元氣也後醫者接踵竟無效至春分逆孫以白螺螄

殼火煨四兩

消痰

為君牡蠣二兩

固瀉

為臣半夏

消痰

葛根

升陽明之清氣

柴胡

升少陽之清氣

苦參

燥濕

各一兩

為佐黃柏

堅腎

一

兩為使麵糊為丸名端本丸令早晚服之不終劑而

愈

李士材治李郡侯白濁服五苓散數劑無功診之兩尺大而瀉是龍火虛炎精瘀竅道用牛膝茯苓黃柏麥冬山藥遠志細生甘草十劑而安

吳光祿閉精行房患白濁莖中痛如刀割自服瀉火踈利之劑不效改服補腎之劑又不效李診之曰精久畜已足為害況勞心之餘水火不交坎離頻用也

有語

病用萆薢分清飲加茯神遠志肉桂黃連四劑即效
兼服補中益氣一二劑而愈

陸祖愚治韓舜臣年近三旬夏月遠歸連宵多事卧當風涼致成瘡疾間一日發自以為虛而投參附凡用參二三錢及五錢者數十劑一醫用參一兩附三錢

又八劑服參約及二斤其病寒輕而熱重偶于靜坐時覺陽道微濕以紙拭視如漿糊一點白而光亮訝為滑精滲漏若此無怪大劑補養無效決死無疑及診視正當悲哀之後面赤如粧六脉洪滑而數曰脉候無事不必張皇令將溺器滌淨次早診之脉畧和而仍滑大令傾溺器中有白膿稠粘約半碗許乃曰當此短夜去已如許之多則從朝至暮自當加倍此是白濁非滑精也試思少壯之時每交感輸洩之精

能有幾何病者始大悟乃用萆薢分清飲川萆薢石
菖蒲益智烏藥茯苓甘草四劑其症減半又以二陳
湯加升麻柴胡蒼朮白朮十餘劑濁淨而瘡亦止夫
奇經之脉督行于背脊任行于腹外衝行于腹中溺
出于前自膀胱而來精出于後自俠脊腎藏而來
男濁女帶自胃家傍衝而下蓋衝為血海其脉起于
臍中丹溪曰胃中濁液下流滲入膀胱上句極為有
理下句恐未必然曾詢患濁者小水或清或渾其濁

或隨溲溺而下或不時淋瀝可見與膀胱竟不相干
又見患此症者經年累月飲食照常起居如故非胃
家濕熱而何此君加之以勞頓醉飽陰虛貪涼而得
故得補益甚丹溪曰二陳湯加升麻能使大便潤而
小便長前後二方昔賢所驗第後人未知用耳

按精與溺原分二道所云良是至謂濁不由膀胱
而出自胃傍衝而下然則湯飲入胃獨不可傍衝
而下乎不知帶濁之病多由肝火熾盛上蒸胃而

乘肺肺主氣氣弱不能散佈為津液反因火性迫速而下輸膀胱之州都本從氣化又肝主疎泄反稟其令而行遂至淫淫不絕使惟胃家濕熱無肝火為難則上為痰而下為瀉耳古今醫案於帶濁二門獨罕存者亦以未達其旨而施治無驗也至單由濕熱而成一味涼燥雖藥肆工人亦能辨此其父肖愚一案治吳南邱之子亦瘡且濁以二妙散取效

立齋治光祿柴黼菴因勞赤白濁如注用歸脾湯而愈

司廳張檢齋小腹不時作痛莖出白淫用小柴胡
加山梔龍膽草山茱萸歸而愈

馬元儀治陳晉臣患濁症累月不止後因房勞痛益甚
濁愈頻有語以煎蘇葉湯澡洗者從之遂致精滑傾
盆躁擾不寧發熱煩渴兩手脉沈而微尺脉不應曰
此陰精大傷真陽無偶將脫不乘此時陰氣尚存一
綫以急救其陽而通其陰直至陰盡而欲回陽罕克
有濟矣或曰既有陽無陰補陰猶恐不及尚堪純陽

之藥重竭其陰乎曰真陽以水為宅水足則凝然不動水竭則不安其位甚而飛揚屑越孰能把握之哉此時陰未回而陽已絕矣宜急攝虛陽先歸窟宅然後補陰以配陽此必然之次序也乃煎大劑白通陽與服便得濃睡諸症漸已次服人參七味湯使陰陽兩平而愈

蕭萬興治一健卒年甫三旬素善飲喜啖辛香病濁竅痛以二陳湯加苓連膽草赤芍車前二劑即止如實

症本不難治若槩施補必變生他症

漳庠林震伯素善飲因修途勞頓飢飽失時復冒暍病
白濁經年不瘥察前治非辛熱即涼瀉或滋補壅塞
遂至小腹脹悶或氣喘拒食六脈滑數無力此中宮
虛熱津液下陷膀胱氣化不能分泌以歸脾湯去木
香加炒山梔半夏車前黃連七劑而濁止便清神思
清爽矣

施笠澤治公謨病小便黃醫欲用淡滲之劑施曰霸樞

不云乎中氣不足溲便為之變但當服異攻散加黃
柏一二分可也醫曰黃柏一二分遂足清利小便耶
曰子不觀之漉酒者乎濁醪數壺以黃柏少許旋澄
清徹底豈一溲不當之衆皆大噉用之果驗

蔣仲芳治梁敬州年六十餘病濁三年矣淡滲寒涼溫
補俱不效診之六脉俱微惟左寸帶數此因心火不
降致脾胃之氣不升濁物因而下滲法當養心升補
若用本病藥無益也用丹參茯苓神遠志棗仁山萸山

藥黃耆白朮升麻柴胡甘草陳皮薑棗煎服三劑其
濁倍至詢其體健否曰如故曰若使所出盡為津液
其體必憊甚今濁增而體健知濁物積于其中為藥
所迫而出耳清者既升濁者自降再服二劑而病如
失矣投之果然使無定見再易一方寧能愈乎

張子和治酒監房善良之子年十三病沙石淋已九年
矣初因瘡疹餘毒不出作便血或告之令服太白散
稍止後又因積熱未退變成淋閼每發則見鬼神號

則驚隣張曰諸醫作腎與小腸病者非也靈樞言足厥陰肝之經病遺溺閉癃閉謂小便不行癃謂淋瀝也此乙木之病也木為所抑火來乘之故熱在脬中下焦為之約結成沙石如湯瓶煎煉日久熬成湯鹼今夫羊豕之脬吹氣令滿常不能透豈真有沙石而能漏者邪以此知前人所說服五石散而致者恐未盡然經曰木鬱則達之先以瓜蒂散越之次以八正散加湯鹹等分頓啜之其沙石自化而下

張氏兒年十四病約一年半矣得之麥秋發則易大痛至握其峻跳躍旋轉號呼不已小溲數日不能下下則成沙石大便秘澁肛門脫出一二寸諸醫莫能治張曰今日治今日效時日在辰巳間矣以調胃承氣僅一兩加牽牛末三錢汲河水煎之令作三五度嚥之又服苦末丸如芥子許六十粒日加晡上涌下瀉一時齊出有膿有血既定令飲新汲水一大盞小溲已利一二次矣是夜凡飲新水二三十遍病去九分

止哭一次明日困卧如醉自後頓失所苦繼與太白散八正散等調一月大瘥此下焦藥也不吐不下焦何以開不令飲水則小溲何以利大抵源清則流清者是也又劉氏子年六歲病沙石淋張以苦劑三涌之以益腎散三下之立愈

一人年二十三歲病膏淋三年矣醫不能效多作虛損補以濕燥灼以針艾無少減張曰惑蠱之疾也亦白濁淫實由少腹鬱熱非虛也可以涌可以泄其人以時

暑憚其法峻不決者三日浮屠一僧曰予以有暑病
近覺頭痛張曰亦可涌願與君同之母畏也于是涌
痰三升色如黑礬汁內有死血并黃綠水又瀉積穢
數行尋覺病去方其來時面無人色及治畢次日面
如醉慮其暑月路遠又處數方使歸以自備云

一男子病淋張令頓食鹹魚少頃大渴又令恣意飲水
然後以藥治淋立通淋者無水故瀆也

一婦人患淋久諸藥不效其夫夜告予予按既效方治

諸淋用剪金花十餘葉煎湯遂令服之明早來云病減八分矣再服而愈剪金花一名禁宮花一名金盞

銀臺一名王不留行

王執中資生經本草綱目

葉朝議親人患血淋流下小便在盆內凝如筍弱久而有變如鼠形但無足耳百治不效一村醫用牛膝根煎汁日飲五服名地髓湯雖未即愈而血色漸淡久乃復舊後十年病沙石脹痛用川牛膝一兩水二盞溫服一婦患此十年服之得效土牛膝亦可入麝香乳

香尤良

本草綱目

薛立齋治一婦人患小便淋瀝內熱體倦以為肝火血少脾氣虛弱用八珍逍遙二散兼服月餘而小便利又用八珍湯而氣血復

一婦人素善小便淋瀝不利月經不調半載矣或兩脇脹悶或小腹作痛或寒熱往來或胸乳作痛或咽喉噎塞或兩脚筋牽或肢節結核面色青黃不澤形氣日瘦左關弦洪右關弦數此鬱怒傷肝脾血虛氣滯

為患朝用加味歸脾湯以補脾氣解脾鬱祛肝火夕
用滋腎丸生肝散滋腎水以生肝血抑肝火舒筋膜
兼服月餘而愈

一婦人小便淋瀝小腹脹悶胸滿喘急諸藥不應以為
轉筋之症用八味丸一服小便如涌而安

孫文垣治杭芝岡酒後近內每行三峰採戰對景忘情
之法致成血淋自仲夏至歲杪未愈便下或紅或紫
中有塊如筋膜狀或如蘇木汁間有小黑子三五日

一發或勞心力或久坐立亦發百治不痊診之其色白而青肌肉削甚脉左寸沈弱關尺弦細右寸畧滑此必肺經有濁痰肝經有瘀血良由酒後竭力縱慾淫火交煽精欲出而強忍之致凝滯經絡流於溺道新血阻塞而成此症也三五日一至者盈科滿溢故耳先與丹參加茅根濃煎服其小便在器中少頃即成金色黃沙乃用腎氣丸加琥珀海金沙黃柏以杜牛膝連葉搗汁熬膏為丸調理外以川芎三錢當歸

七錢杜鵑煎服臨發時以滑石甘草梢桃仁海金沙麝香為末以韭菜汁調服去其凝精敗血則新血始得歸源而病根可除矣三月全愈

族姪善飲好內病血淋與滑石甘草梢海金沙琥珀山梔青蒿茅根煎膏為丸梧子大每空心及食前燈心湯送三錢不終劑而愈後數年服補下元藥過多血淋又作小便痛極立不能出必蹲便乃得所出皆血塊每行必一二椀許已半月諸通利清熱之劑不應

脉洪數以五靈脂蒲黃甘草梢各二錢水煎空心服
二帖痛減半改用瞿麥山梔甘草各二錢茅根杜牛
膝連葉車前草各三錢生地柴胡木通黃柏各一錢
四帖痛全減血止惟小便了而不了以人參葛根青
蒿白朮茯苓甘草白芍升麻黃柏知母而痊

康侯云治暑氣在內小便血淋用白虎湯加麥冬煎屢
取其效此亦有理

志雅堂錄
抄周密

李時珍治一男子病血淋痛脹祈死李以藕汁髮灰每

服二錢服三日而血止痛除

本草綱目

深師療淋用葛上亭長折斷腹腹中有白子如小米三分安白版上陰二三日收之若有人患十年淋服三枚八九年以還服二枚服時以水如棗許著小杯中用爪研之當扁扁置於水中仰面吞之勿令近牙齒間藥雖微下喉自覺至下焦淋所有頃藥作大煩急不可堪飲乾麥飯汁則藥熱止也若無乾麥飯但水亦可耳老小服三分之一當下淋疾如濃血連連

耳去者或如指頭或青或黃不拘男女皆愈若藥不快淋不下以意節度更增服之此蟲五六月為亭長頭赤身黑七月為斑蝥九月為地膽隨時變耳

上全

李士材治嚴邑宰患淋經年痛如刀錐凡清火疎利之劑計三百帖病勢日甚脉之兩尺數而無力是虛火也緣泥痛無補法愈疎通則愈虛愈虛則虛火愈熾遂以八味地黃料加車前沈香人參服八劑痛減一二而頻數猶故前醫復云淋症作痛定是實火若多

溫補恐數日後必將悶絕不可救矣彼疑而問李李
曰若不宜溫補服藥後病勢必增今既減矣復何疑
乎朝服補中益氣湯晚服八味丸逾月而痰去其九
更倍用參耆十四日霍然矣

杜司寇夫人淋瀝兩載靡藥不嘗卒無少效診之兩尺
沈數謂有瘀血停留法當攻下因年高不敢輕投但
於補養氣血之中加琥珀牛膝此等緩劑須以數十
劑收功而夫人躁急求效輒欲更端遂致痼疾

馮楚瞻治李參領年將六旬患淋兩載有時頻利且速
有時點滴難通急痛如割肥液如脂如膏或成條紫

血日夜不堪時欲自盡詢所服有醫主通

此輩伎倆原只如此

乃服通利則頻數無度矣服止瀉則結滯難通矣按
其脉兩寸甚洪餘皆無力獨肝腎更甚曰肝主疎泄
腎主閉藏今肝腎俱病各廢乃職利則益虛其虛澀
則愈增其滯惟調補肝腎自愈用八味加麥冬二錢
升麻八分紅花四分重用人參煎服使清者升濁者

降痰者化中氣既足肝腎既調開闔自然得所矣後
以生脉飲送八味丸于空心以歸脾加減服于午後
全安

一少年勞心色慾過度患小便淋瀝脹疼且二便牽痛
其脉兩寸沈微左關甚弱右關弦滑兩尺弦濡乃心
肺之氣不足下陷肝腎之氣又不足不能踈洩閉藏
清陽不升中宮鬱滯滲入膀胱乃似淋非淋二便牽
痛如大瘕泄也今早服六味丸加黃蘗製附子

使寒熱互為向導以去濕熱食遠用補中益氣湯去陳皮柴胡加茯苓防風酒炒其渣臨晚煎服遂愈

張路玉治內閣文湛持夏月熱淋醫用香薷飲益元散五日不應淋瀝轉甚反加心煩不寐診之見其唇赤齒燥多汗喘促不時引飲脉見左手虛數知為熱傷元氣之候與生脉散頻進代茶至夜稍安明日復苦澀便澁數然其脉已和仍用前方不時煎服調理五

日而瘥

太史沈韓倬患膏淋小便頻數晝夜百餘晝則滴瀝不通時如欲解夜雖頻迸而所解倍常溲中如脂如涕者甚多服清熱利小便半月餘其勢轉劇面色痿黃飲食兼退脉得弦細而數兩尺按之益堅而右關濡大少力此腎水素弱加以勞心思慮肝木乘脾所致法當先實中土使能隄水則陰火不致下溜清陽得以上升氣化通而疼澁瘳矣或曰邪火亢極用參耆

補之得毋助長之患乎抑知陰火藥虛下陷非開提清陽不應譬之水注塞其上孔傾之涓滴不出所謂病在下取之上若清熱利水氣愈陷精愈脫而溺愈不通矣遂與補中益氣湯用人參三錢服二劑痛雖少減而病者求速效或進四苓散加知母門冬沙參花粉甫一劑徹夜痛楚於是喘服前方兼六味丸用紫河車熬膏代蜜調理服至五十劑參盡斤餘而安陝客亢仁軒年壯色蒼體豐善啖患胞痺十餘年泊吳

求治其脉奕大而瀼瀼不調不時蹲踞於地以手揉其莖囊則洩從穀道點滴而滲必以熱湯沃之始得稍通寐則有時而遺其最苦者中有結塊如橘核外裹紅絲內包黃水襍于脂膩之中此因恣飲不禁酒濕乘虛入髓竅而為患因令堅戒烟草火酒濕麵椒蒜糟醋雞豚炙膊等味與半夏茯苓猪苓澤瀉萆薢犀角竹茹作湯四劑不應則以不遵禁忌故乃令堅守勿犯方與調治仍用前藥四劑減二三與腎瀝

湯加草薢數服水道遂通溲亦不痛但食不甘美後以補中益氣加車前木通調之而安

肥盛多濕故先與清胃豁痰而

後理腎調膠

侍衛金漢光年逾花甲初夏誤飲新酒致病前則淋瀝瀉痛後則四痔腫突此陰虛熱陷膀胱也先與導赤散次進補中益氣勢漸向安惟孔中瀉痛未除或令進益元散三服遂致遺溺不能自主授劑不應直至新秋脉漸與弱因採腎瀝之義以羯羊腎製補骨脂

羊脬製兔絲子濃煎桑根皮汁製螬蛸連進三日得
終夜安寢涓滴靡遺矣

閔少江年高體豐患胞痺十三年歷治罔效凡遇勞心
嗔恚或飲食失宜則小便頻數滴瀝瀦瀦痛不已夜畧
交睫即滲漉而遺覺則阻滯如前服人參鹿茸紫河
車無算然皆無礙獨犯丹皮白朮即脹痛不禁

香燥之藥

誤投殺人
世罕知也

張診之曰病名胞痺

俗名尿管病

惟見於內經

由膏粱積熱於上作強傷精于下濕熱乘虛聚于膀

脫素問云胞痺者小腹膀胱按之內痛若沃以湯瀦
于小便上為清涕詳其文則知膀胱虛滯不能上吸
肺氣肺氣不清不能下通水道所以瀦滯不利得湯
熱之助則小便澁澁微通其氣循經蒸發肺氣暫開
則清涕得以上泄也因與腎瀝湯方服之其效頗捷
原其寢則遺溺知肝虛火擾踈泄失宜所以服丹皮
踈肝之藥則脹不勝氣之竄以擊動陰火也服白朮
亦脹者不勝其味之濁以壅滯濕熱也服人參鹿茸

河車無礙者虛能受熱但補而不切於治也更擬加減桑螵蛸散用羊腎湯泛丸庶有合于病情然八秩之年猶恃體豐不遠房室藥雖中竅難保其不復也

與前陝客案
症治畧同

黃元吉年六十餘因喪明畜妾患小便淋澁春間顛仆昏憤遺溺後遂時遺或發或止至一陽後其症大劇晝則苦于不通夜則苦于不禁其脉或時虛大或時細數而左關獨弦此腎氣大虧而為下脫之兆也乃

與地黄飲子數服溺瀦少可遺亦少間後與八味丸去丹皮澤瀉加鹿茸五味巴戟遠志調理而安

新安富室有男子淋溺不止者漸痿黃諸醫束手孫卓

三治之亦弗效偶隱几坐以手戲弄水灌後孔塞則

前竅止開則通為腦後一穴灸火三炷立愈

江西通志

王肯堂治外兄賀晉卿因有不如意事又當勞役之後忽小腹急痛欲溺溺中有白物如膿并血而下莖中急痛不可忍正如滯下後重之狀日夜十數行更數

醫不效乃作淤血治令以牛膝四兩酒浸一宿長流水十碗煎至八碗再入桃仁一兩去皮炒紅花二錢五分當歸一兩五錢木通一兩生甘草二錢五分苧麻根二莖同煎至二碗去渣入琥珀末二錢麝香少許分作四服一日夜飲盡勢減大半按素問奇病論云病有癰者一日數十溲此不足也今瘀血雖散宜用地黃丸加兔絲杜仲益智牛膝之屬補陰之不足以杜復至因循未修治遂不得全愈或閉或通一夜

數十起溺訖痛甚竟服前丸及以補腎之藥入煎劑調理而安

從兄爾祝得淋疾日數十溲畧帶黃服五苓散稍愈因腹中未快多服利藥三五日後忽見血星醫以八正散治之不應詢其便後時有物如膿小勞即發診得六脉俱沈細右尤甚此中氣不足也便後膿血精內敗也經云中氣不足則溲便為之變宜補中益氣湯加順氣之藥以滋其陽六味地黃丸踈內敗之精以

以補其陰更加五味子斂耗散牛膝通脉絡數劑而
安

蕭萬興治鄭友患淋經年屢治罔效曰淋症有虛實寒
熱之殊今君年未三旬元氣充實因修途勞役飲食
不調復喜火酒脾受濕氣時當炎令丁火司權丙火
協應故心移熱小腸五火因而內灼上肺燥口渴下
腎燥淋結前服八正五淋只專治淋而未知清水上
源滋益肺金故不效以二陳小柴胡加龍膽草知母

木通麥冬一劑減數劑全瘳

朱司馬六間年五旬艱嗣不慎酒色飲食起居失宜面
目青黑怒則暈大便秘塞脫血小便淋血如割屢服
清火通淋之劑反增劇脉沈遲兩尺蕪澁此腎枯竭
不能滋生肝血遂致虛火上炎移熱二腸迫血下行
因而隧道瀝枯妨礙升降故每欲便疼塞難堪須用
甘溫之品滋益化源補養肝木使陰血盛則津液充
而淋秘自解矣以補中益氣湯去柴胡倍人參加牛

膝少加肉桂及加減八味丸八人參從蓉遠志服月餘漸愈

張雲汀年近四十因暑月往來道途多飲火酒遂成癰閉廣陵醫者已多與清熱滲利之劑黃連服至三兩不能愈旋里後診之右尺洪大左尺不應指口燥渴知其三陰已傷與六味地黃湯殊未效更醫仍用車前赤苓琥珀木通瞿麥扁畜五苓六一之類遂致一夜必便百餘次溺惟點滴少腹急痛而脹窘迫甚

面漸黧黑此復傷少厥二陰致踈泄秘密俱失其職而太陰太陽之升降氣化亦紊也今朝服補中益氣暮服六味地黃每方各三十劑乃痊

疝

杜壬治三十七太尉忽患小腸氣痛諸醫不效每一發幾死上召杜至進藥不數服無驗太尉曰我命不久致良醫不能治上召杜問所以杜對臣用古方皆不獲愈今日選一方容進上遂合藥以進一服十愈八

九再服全愈因名方曰救命通心散川烏頭一兩用
青鹽一錢酒一盞浸一宿去皮尖焙乾川楝子一兩
用巴豆二十一粒同炒候黑色去巴豆茴香半兩石
燕一對土狗五枚芥子一錢六分為末每服三錢入
羊石子內濕紙煨香熟夜半時用好酒半升八鹽細
嚼石子以酒嚥下不得作聲其病遂去

曹五家今綱
目秘此方

辛稼軒初自北方還朝官建康忽得疝疾重墜大如杯

有道人教以取葉珠

即薏苡仁

用東方壁土炒黃色然後

小煮燥入砂盆內研成膏每用無灰酒調下二錢即消程沙隨病此稼軒授之亦效

宦遊紀聞

張子和治殄寇鎮一夫病瘡瘡發渴痛飲蜜漿劇傷水水醫者莫知瀉去其濕反襍進薑附濕為燥熱所壅三焦閉溢水道不行陰道不興陰囊腫墜大於升斗張先以導水百餘丸少頃以猪腎散投之是夜瀉青赤水一斗遂失痛之所在又潁尾一夫病卒疝赤腫大痛數日不止諸藥如水投石張以導水一百五十

九令三次咽之次以通經散三錢空腹淡酒調下五更下臟腑壅積之物數行痛腫皆去不三日平復如故

李審言因勞役飲水坐濕地乃濕氣下行流入脬囊大腫痛不可忍以金鈴川棟子等藥不效求治於張曰可服泄水丸審言惑之又數日痛不可堪竟從張先以舟車丸瀆川散下青綠沫十餘行痛止次服茴香丸五苓以調之三日而腫退至老更不作夫疝者乃

肝經也下沫者肝之色也

王敏之病寒、疝脇下結聚如黃瓜每發繞脇急痛不能忍以舟車丸猪腎散下四五行覺藥繞病三五次而下其瀉皆水也猪腎甘遂皆苦寒經言以寒萬舉萬全但下後忌飲冷水及寒物宜食乾物以寒、疝本是水故也即日病減八分食進一倍又數日以舟車丸百餘粒通經散四五錢服之利下候三四日又服舟車丸七八十粒猪腎散三錢乃健走如常矣

一僧病疝發作冷氣上貫齒下貫腎緊若繩挽兩畢時
腫而冷兩手脉細而弱斷之曰秋脉也此因金氣在
上下伐肝木木畏金抑而不伸故病如是肝氣磔礪
不能下榮于畢九故其寒實非寒也木受金制傳之
胃土胃為陽明故上貫齒病非齒之病肝木者心火
之母也母既不伸子亦屈伏故下冷而水化乘之經
曰水鬱則達之土鬱則泄之令涌泄四次果覺氣和
畢九痒而暖此氣已入畢中也以茴香木茂之藥使

常服之一月而愈

霍秀才之子年十二，畢九一，旁腫腿，張見之曰：此因驚恐得之。驚之為病，上行則為嘔血，下則腎傷。而為水腫，以琥珀通經散一瀉而消散。

朱丹溪治鄭子敬，因喫酒後飲水，與水果，偏腎大時作蛙聲，或作痛炒枳實一兩，茴香、鹽炒、炒梔子各三錢，研煎下保和丸。

昌世官膀胱氣下墜如蛙聲，臭橘子核炒十枚，桃仁二

十枚蘿蔔自然汁研下保和丸七十丸

湜兄年三十左腎核腫痛此飲食中濕墜下成熟以橘

核

即臭橘

五枚桃仁七枚細研順流水一盞煎沸熱下

保和丸

龔子才治一船家小腸疝氣腫痛不可忍又病兩眼腫痛眵淚隱瀋兩寸脉洪數兩尺脉微此上盛下虛之症用涼藥治眼則疝痛愈增用熱藥治疝則眼痛愈盛百治不效與木香金鈴丸空心服以治下焦之虛

寒以退血散卧時服以治上焦之風熱各三服均愈
趙雪山因房勞後五更起早感寒疝氣痛不可忍增寒
戰慄六脉微而無力以五積散加吳茱萸小茴香又
與蟠葱散俱不效後以艾灸之將患人兩腳掌相對
以帶子綁住兩中指合縫處以艾炷麥粒大灸七壯
完痛止神效

子才親家周少峰患疝氣偏墜腫痛不可忍遇秀才傳
一方用黃土水和作乾泥拍作大餅于火上烘熱熨

痛處冷則再易立愈

萬密齋治朱氏子病卵腫逾年不消成癰疽矣問萬萬
曰足厥陰肝經之脉環陰氣肝之病為怒小兒性急
多哭者常有此症一名氣卵常見人病此者不廢生
育與壽無干曰有治法否曰有勿求速效可也用川
棟肉小茴香青皮山萸肉木香當歸川芎海藻三棱
莪朮二味用黑牽牛同炒去牽牛不用共為末神麴
為丸溫酒下更灸臍旁穴而腫消矣

喻嘉言治胡翁常苦脾氣不旺邇年少腹有疝形如鵲
卵數發後其形漸大而長從少腹墜入畢囊甚易返
位甚難下體稍受寒即發發時必俟塊中冷氣漸轉
暖熱始得縮入不然則脹於隘口不能入也近來益
大如卧酒瓶于胯上半在少腹半腹半在畢囊堅緊
如石其勢迸入前後腰臍各道筋中同時俱脹上攻
入胃則大吐上攻顛頂則戰慄畏寒喻診之知為地
氣上攻亟以大劑參附薑桂投之一劑而愈以後但

發悉用桂附連效若服十全大補則不應以半陽半陰之藥勿克勝病也凡陰邪為害不發則已其發必暴試觀天氣下降則清明地氣上升則晦塞醫遇直中陰經之病尚不知所措手沉雜症乎第薑桂性熱屢服則慮其僭上舊病未除新病必起乃先以薑桂附子為小丸曝令乾透然後以參朮厚為外廓俾喉胃間知有參朮不知有薑桂附子及達積塊之所猛烈始露于是病乃漸瘳

孫文垣姪患偏墜臍腹腰俞俱脹痛左關脉弦大鼓指
小茴香甘草蒼朮益智仁防風各五分荔枝核山
查柴胡各一錢山梔青皮各七分服後其痛如舊脉
且轉數恐作囊癰急為解毒瓜蒌五錢當歸甘草節
金銀花各一錢連翹柴胡青皮各七分煎服痛定腫
消因食雞魚臍腹脹痛發熱不眠脉復弦以山查瓜
蒌各二錢金銀花連翹各八分甘草節黃連當歸各
五分青皮七分二帖愈

李士材治尹文輝嗜火酒能飲五斤五月間入閩中溪水驟漲涉水至七里覺腹痛甚半月後右丸腫大漸如斗閩中醫者皆與肝經之劑及溫熱之品半載無功歸就診李曰嗜火酒則濕熱滿中涉大水則濕熱外束今病在右正是脾肺之濕下注辜丸以胃苓湯加梔子枳殼黃柏茴香十劑畧減即以為丸服至十八斤全安

駱元賓十年患疝形容枯槁李視之左脇有形其大如

箕以熱手按之漑漑有聲甚至上攻於心悶絕良久以熱醋熏灸方醒李曰此經之所謂厥也用當歸四送湯一月積形衰小更以八味丸間服半載餘積塊盡消不復患矣

盧不遠治湯某長病腹痛痛則繞臍有形甚則欲死皆謂生氣獨絕于內慮不起診之關脉近尺有滑附之久痛氣羸頗乏精彩因用枸杞為君白芍茯苓肉桂吳萸佐之六劑痛止服瑞竹堂方四製枸杞丸一料

竟愈夫劑疝疝當引陰原無斯症蓋疝者有形之痛而有所止之處故字從山不必定引陰也疝本厥陰肝疾其狀若死亦厥陰症故用溫補肝腎藥而瘳

馮楚瞻治王刑部疝痛甚危脉之左三部弦洪而數乃陰甚不足也右關尺洪大重按有力此膏粱酒濕太過房勞真水消亡木失所養筋無所榮濕熱內攻陰寒外遏為疝為脹不可忍以熟地二兩山萸山藥各二錢滋其肝腎丹皮三錢茯苓二錢五分滲其濕熱

橘核三錢踈其木鬱製附一錢五分鹽酒炒黃柏一錢二分使寒熱互為向導由是外寒散內熱除真水生雷火息而瘳

張建東秘傳治一切疝氣神方於洗浴畢濕身坐門檻上兩囊著木印一濕印即于濕印患左灸左患右灸右俱患則左右俱灸須避四眼又一法午月午日午時灸尤妙或小兒不須洗浴但用灰布門檻上令兒坐之亦就所印灸即愈

沈序皇
尊聞錄

王叔權曰舍弟少戲舉重得偏墜之疾有客人為當關
元兩旁相去各三寸青脉上灸七壯即愈王彥賓患

小腸氣灸之亦愈

資生經醫
說續編

項關一男子病卒疝暴痛不任倒于街衢人莫能動呼
張救之張引經證之邪氣客于足厥陰之絡令人卒
疝故病陰丸痛也急瀉大敦二穴其痛立已夫大敦
穴者乃足厥陰之二穴也

鄭亨老病疝灸之得效其法以淨草一條茅及麥稈尤

妙度病人兩口角為一則摺斷如此三則則摺成角如△字樣以一角安臍中心兩角在臍之下兩傍尖盡處是穴若患在左即灸右在右則灸左兩邊俱患即兩穴皆灸艾炷如麥粒大灸十四壯或二十一壯即

安也

醫說續編

奪命丹治遠年近日小腸疝氣偏墜搐疼臍下撮痛以致悶亂及外腎腫硬日漸滋長陰間濕痒抓成瘡悉治之吳茱萸一斤

去枝梗四兩酒浸四兩醋浸四兩湯浸四兩童便浸各一宿同焙乾

澤瀉二兩

去土 灰

右為細末酒煮麵糊為丸如梧桐子

大每服五十丸空心食前鹽湯或酒下神妙不可具述馮仲柔云頃年某倉使家傳因令局中合賣紹熙壬子冬予親曾得效時苦奔狔寒氣攻衝小腹引痛四日只一服臟腑微動痛若失去遂安一方名星斗丸湯浸者用鹽水浸澤瀉用四兩切作粗片酒浸一

宿

是齋方
全上

一人病後飲水患左丸痛甚灸大敦適摩腰膏內用烏

附丁麝者將以摩其囊上抵橫骨端灸後溫帛覆之

痛即止一宿腫亦消矣

藥要或問全上

薛立齋治一婦人小腹痞悶小便不利內熱體倦懶食

用八珍湯加柴胡山梔龍膽草治之而安

良方附疝瘕門

王肯堂曰張仲景治寒疝腹中痛及脇痛裏急者當歸

生薑羊肉湯主之本草衍義稱其無不應驗豈非補

肝之效乎余每治病甚氣上沖心危急者以八味丸

投之立應又補腎之明驗也

羅謙甫治漆匠韓提控疝氣每發痛不可忍則于榻兩
末各置一枕往來伏之以受如是三年不已與丁香
練石丸三劑良愈蓋男子七疝痛不可忍者婦人瘕
聚帶下皆任脉所主陰經也乃肝腎受病治法同歸
于一當歸附子川棟子茴香各一兩右剉碎以好酒
三升煮酒盡為度焙乾作細末每藥末一兩八丁香
木香各五分全蝎十三個元胡索五錢同為細末拌
勻酒糊為丸桐子大每服三十丸至百丸溫酒空心

送下凡疝氣帶下皆屬于風全蝎治風之聖藥也川
棟茴香皆入小腹經當歸元胡索和血止痛疝以寒
邪積于小腸之間故以附子佐之丁香木香為引導
也

王海藏云楊駙馬時患風氣衝心

風氣即疝氣也羅謙甫云疝氣帶下皆屬

于風飲食吐逆遍身枯瘦日服紫菀丸至二十日瀉出

肉塊如蝦蟇五六枚白膿二升愈

方見瘰癧門

李靈惠肥氣病

肝積謂之肥氣與疝同類

日服前九五九經一年瀉

出肉驚二枚愈

馬元儀治陳子芳患痰喘發熱胸滿身痛左邊畢九不時逆上痛不可忍診之肝脉弦急肺脉獨大關尺虛小此肝肺受邪之候也肝為木藏其化風其生火風火合邪于本位則為熱為痛乘于肺金則為痰為喘以柴胡疎肝散治之表症稍安欲速愈別用沙參二兩煎服始若相安繼轉增劇再急診寸脉鼓數關脉急疾左九引右九痛甚曰關脉急疾木火自旺也寸

脉鼓數火刑肺金也肺為嬌藏體燥氣肅火邪入之則氣化失常金益困而水益張也法宜滋達肺金兼踈肝木以瓜蒌實五錢潤燥紫苑三錢宣通半麴貝母清痰枳殼桔梗開鬱杏仁蘇子定喘柴胡以達之秦艽以舒之一劑減再劑安調補而愈

琇按用沙參原無大謬第單用且重至二兩又無甘潤之佐則清降之力薄而速反致木火厥張云耳

立齋治一男子年逾四十陰囊腫痛以熱手熨之少緩服五苓等散不應尺脉遲軟此下虛寒邪所襲而然名曰寒疝非瘡毒也以蟠葱散治之少可更以葫蘆巴丸服之而平

杜舉人名京年逾三十陰囊濕痒莖出白物如膿舉則急痛此肝疝也用龍膽瀉肝湯而愈有陰莖腫或縮或挺或痒亦以此藥治之

施笠澤治錢元一患疝氣衝痛盖有年矣每抑鬱則大

作嘔吐痰涎不進飲食已未春病且浹旬診得左關
弦急而鼓右關尺俱浮大而無力此命門火衰不能
生土肝木乘旺復來侮脾用葫蘆元胡索等疏肝之
劑以治其標隨用八味丸益火之原以消陰翳間進
參朮補脾之藥以治其本漸服漸安數載沈痾不三
月而愈

朱氏
選

錢國賓云黃州客陳思雲負貨行至德州賃館其人素
有疝氣忽然陰子漸大如斗半月卧牀不起偶有道

人化齋彼甚嗔怪道人曰爾病尚得我醫如何發怒
遂請進見坐問根由與芟實大紅藥丸用無根涼水
送下拱之而去約三日後再來看汝陳服藥腹中微
响若周身氣行之狀至三日消已大半道人又至仍
與前藥二丸三日一次服盡陰子如故謝銀一兩不
受討紫花布道袍一件而去陳求丸方曰此藥汝不
能合用紫金錠亦可以消斗大之陰子也余與同寓
親見其治九日而消斗大之陰子真仙丹也

蔣仲芳一日治二疝一人升上作痛一人墜下作痛俱
悶痛欲絕升上者與故紙三兩炒黑豆一兩生硫黃
七錢俱為末鹽酒打餅麪為丸鹽酒送下墜下者與
補中益氣湯加杜仲故紙肉桂炮薑香附川芎二人
駭曰疝氣同也何方之不同若是曰姑試之至明日
而皆愈

潘惟秋間患疝氣症服肉桂小茴香荔枝之類不應自
用生薑泡炒糖湯服一二日稍愈遂止飲沙糖湯而

愈

沈初兄
抄本

吳橋治胡有濡父旦遞以疝作逆橋橋以其人習飲醇
第以涼劑而清濕熱遂愈一日疝作適橋他出乃逆
方生家人出橋舊方示之生按方而治不效頃之則小
溲浸短小腹浸堅復逆文學先生至注黃金二鎰內
文學篋中文學力任之治再信而病益進短者枯堅
者石矣既而橋至則病甚遞出錯言橋心異之此神
亂也既診曰殆矣有濡曰家大人疝遞作賴公一再

劑而瘳乃今兩君子亦仿故方何卒不效橋曰此刻
舟也今病得之內當在陰兩君復以陰藥投之嫌于
無陽也既以陰劑陰陽失其健而不能運則壅閼矣
家人偵其故則故女豎私焉橋辭歸旦中夜死文學
肱篋歸金而去

太函集

汪氏甥素有血症發則囊如盛二升粟增寒壯熱或與小
茴香青皮木香胡盧巴等服之囊赤而痛甚勢將成
癰次日仍與前藥診之脉數大無倫面赤黯亟用熟

地二兩杞子一兩川棟一枚一劑而愈後與人關顛
頂著棒悶絕而甦次日陰囊腫大如疝發時于是顛
痛甚則囊痛減囊痛甚則顛痛減寒熱往來喘科逆
治無效蓋厥陰肝脉下絡纂上行顛故上下相連而
其痛則互為消長也與前方數劑上下皆愈凡疝治
之失宜過服香辛燥烈之劑遂成勞損者夥矣

鮑二官六七歲時忽腹痛發熱夜則痛熱尤甚或謂風
寒發散之不效又謂生冷消導之不效診之面潔白

微有青氣按其虛里則築築然跳動問其痛云在少
腹驗其囊則兩睪丸無有曰此疝痛也與生地甘杞
沙參麥冬川棟米仁二劑全愈凡疝症雖有寒濕痰
氣之殊余所愈多以此方捷如桴鼓蓋症雖不一而
病屬厥陰則一也要之肝木為病大抵燥火多而寒
濕絕少也余鍼兒十歲時忽擲地以拳柱其腹宛轉
不能語察其面青知疝發也亟以杞子一兩川棟一
枚煎服下咽立愈

小便秘

朱丹溪治因服分利之藥太過遂致秘塞點滴不出謂其胃氣陷于下焦用補中益氣湯一服而通因前多
用利藥損其腎遂致通後遺溺一夜不止急補其腎
然後已凡醫之治是症者未有不用泄利之劑誰能
顧其腎氣之虛哉

醫貫藥要成或問出醫說續編

盛用敬治文學姚汝明內傷新愈又病食傷他醫皆用
下藥病益甚小便秘閉中滿腹堅如石

三陰受傷所致

盛診之

曰此不可用分理藥也

理當作利

宜以參耆運其氣升柴

提其氣氣升則水自下矣加以益腎之劑數服霍然

吳江

志

鍾大延治徐大理病小便秘腫脹面赤發喘衆醫皆從
熱症治愈甚大延診之曰是無火也急煮附子湯一

服而愈

寧波府志

錢塘有人小便腸秘百方通之不效有一道人錢宗元
視之反下縮小便藥俄而遂通人皆怪之以問宗元

曰以其秘故醫者驟通之則小便大至水道愈溢而小便愈不得通矣今吾縮之使水道稍寬此所以得流也此一治殊為特見

北窗
灸輟

黃氏小便不通陳雁麓用芒硝一錢研細龍眼肉包之

細嚼咽下立愈

續金陵
瑣事

竹鎮有人病溺不下求于乩仙判云牛膝車前子三錢

共五錢同剉為粗末將來白水煎空心服之果愈

居易

錄

龔子才治一人小便不通服涼藥過多脹滿幾死以附子理中湯加琥珀末調服立通

一人小便不通已經七八日遍身手足腫滿諸醫罔效以紫蘇煎湯入大盆內令病人坐上熏蒸冷則漆滾湯外用鹽炒熟熨劑上遍身腫處良久便通腫消而愈

李士材治王郡守痰火喘盛咳正甚時忽然小便不通自服車前木通茯苓澤瀉等藥小腹脹悶點滴不出

李曰右寸數大是金燥不能生水之故惟用紫菀五錢麥冬三錢五味十粒人參二錢一劑而小便涌出如泉若淡滲之藥愈多則反致燥急之苦不可不察也

先兄念山以謫官鬱怒之餘又當盛夏小便不通氣高而喘以自知醫服胃苓湯四帖不效李曰六脉見結此氣滯也但用枳殼八錢生薑五片急火煎服一劑稍通四劑霍然矣

俞孝廉脩府志勞神忽然如喪神守小便不通李診之
曰寸微而尺鼓是水涸而神傷也用地黃知母各二
錢人參丹參各二錢茯苓一錢五分黃柏一錢二劑
減十劑乃全安

馮楚瞻治王氏女年十三小便不通甚危初二三歲時
乳母恐其溺牀切戒之由是寤寐刻刻在心

二三歲時事安

能記憶

數年以來日中七八次夜中七八次習以為常

漸有淋狀近來益甚或以導赤利水之劑投之初服

稍應久則增劇點滴不通脉之六部洪數久按無神
知為過于矜持勉強小便心腎久虛又服利水之劑
真陰益槁臟涸津枯氣何能化以八味湯加五味麥
冬取秋降白露生之意也每劑納熟地二兩連進兩
服使重濁以滋之為小便張本再以其渣探吐之上
竅既開下氣兼清下焦濕熱斯得矣今氣虛下陷已
久一兩劑未能收功安得伏枕而卧且此不寐非心
血不足乃因著意防閑小便故也暫以物襯席上任

其流出免取溺器致擾其神自然熟睡矣以補中益氣湯提補上中二焦元氣加黃柏知母祛下焦濕熱使清陽升則濁陰自降腠無濕熱則不下墜竅可對而病可瘳矣如法治之果嗒然而覺早視襯布亦不甚濕以久不闔目得此恬寢神氣頓回如未病者調理四日而安

張隱菴治一書吏患癰閉諸治無效以補中益氣投之一劑而愈或問曰此症人皆利治之不效今以升提

治而效其故何也曰君不見夫水注子乎閉其上而倒懸之點滴不能下矣去其上之閉而水自通流非其驗耶

薛立齋治一婦人患小便淋瀝不通面青脇脹諸藥不應此肝經氣滯而血傷用山梔川芎煎服而愈

一婦人小便不利小腹并水道秘悶或時腹脇脹痛此肝火用加味道遙散加龍膽草四劑稍愈乃去膽草佐以八珍散加炒黑山梔兼服而愈

鄭真一曰木瓜乃酸瀋之品世用治水腫腹脹誤矣有大寮舟過金陵愛其芬馥購數百顆置之舟中舉舟人皆病溺不得出醫用通利藥罔效迎余視之聞四面皆木瓜香笑謂諸人曰撤去此物溺即出矣不必用藥也于是盡投江中頃之溺皆如舊

本草
備要

汪訥菴曰家母舅童時病溺塞服通淋藥罔效老醫黃五聚視之曰此乃外皮竅小故溺時艱難非淋症也以牛骨作楔塞于皮端竅漸展開藥而愈使重服通

利藥得不更變他症乎乃知醫理非一端也

全上

一人燥熱傷下焦致小便不利當養陰當歸地黃知母

黃柏牛膝茯苓甘草白朮陳皮之類

治法

紹興劉駐泊汝翼云魏郊知明州時宅庫之妻患腹脹
小便不通垂殆隨行御醫某人治此藥令服遂愈瓜
羹不拘多少焙乾碾為細末每服三錢重熱酒調下
不能飲者米飲調下頻進數服以通為度

是齋方

小便不禁

附頻類遺瀝

孫文垣治倪二南內人小水不禁一日二十餘脉之右寸洪而有力左寸虛右尺沈微此心腎不交也以當歸遠志與之五日而安後凡遇辛苦則發以此服之立效

薛立齋治一婦人小便自遺有時不利日晡益甚此肝熱陰挺不能約制用六味丸料加白朮酒炒黑黃柏七分知母五分數劑諸症悉愈若誤用分利之劑愈損真陰必致不起矣

一老婦患前症惡寒體倦四肢逆冷薛以為陽氣虛寒用補中益氣加附子三劑不應遂以參附湯四劑稍應仍以前藥而安附子計用四枚人參三斤許

李士材治張方伯夫人患飲食不進小便不禁李曰六脉沈遲水泉不藏是無火也投以八味丸料兼進六君子加益智仁肉桂二劑減數劑瘳

俞文學憂憤經旬忽然小便不禁醫皆以固脬補腎之劑投之凡一月轉甚李診之曰六脉舉之則軟按之

則堅此肝腎之陰有伏熱也用丹皮茯苓各二錢甘草梢六分黃連一錢煎成調黃雞腸與服六劑而安矣適有吳門醫者曰既愈當大補之數日後仍復不禁再來求治李曰肝家素有鬱熱得濕補而轉熾遂以龍膽瀉肝湯加黃雞腸服之四劑即止更以四君子加黃連山梔一月而痊

張三錫治一人病風狂服甘遂等利藥太過小水不禁服桑螵蛸散未終一料而安真桑螵蛸同桑皮炒遠

志菖蒲龍骨人參茯苓當歸龜板醋炙以上各一兩
為末以參湯調下二錢

薛立齋治一婦人患小便頻數日晡熱甚此肝脾血虛
氣滯而兼濕熱也用加味道遙散加車前子而愈
一婦人久患前症泥屬于火雜用寒涼之劑虛症悉具
曰此脾胃虧損而諸經病也當補中氣為主遂以六
君補中二湯兼服兩月餘而愈

劉大參年逾六旬形氣瘦弱小便不禁或頻數內熱口

乾或咳痰喘暈此肺腎氣虛用六味丸益氣湯以滋
化源彼不信反服補陰降火瀉精之劑陰囊作痛或
小便不利仍服前藥不兩月而愈

王執中壯年寓學忽有遺瀝之患因閱方書見有用五
倍子末酒調服者服之而愈藥若相投豈在多品而

亦無事于灸也

資生
經

大便不通

安康郡太守苦風祕陳為處二仁丸杏仁去皮尖麩炒

黃麻仁另研枳殼去瓤麩炒為末訶子炒去核為末
右用煉蜜為丸桐子大每服二三十丸溫水下未利
增之乃愈

薛立齋治一老婦大便秘去而難去又不堅實腹內或
如故或作脹兩關尺脉浮大薛以為腸胃氣虛血弱
每服十全大補湯加鹿從蓉去後始快若間二三日
不服腹內仍脹大便秘仍難

一婦人大便秘瀉諸藥不應苦不可言令飲人乳而安

張子和曰頃有老人年八十歲臟腑瀯滯數日不便每臨便時頭目昏眩鼻塞腰痛積漸食減縱得食便結燥如彈一日友人命食血臟葵羹油滌菠薐菜遂頓食之日日不乏前後皆利食進神清年九十歲無疾而終圖經云菠薐寒利腸胃芝麻油炒而食之利大便葵寬腸利小便年老之人大小便不利最為急切此亦偶得瀉法耳

子和表兄病大便秘滯無他症常不敢飽食飽則大便

極難結實如錢石或三五日一如圓目前星飛鼻中
血出肛門連廣腸痛痛極則發昏服藥則病轉劇已
豆芫花甘遂之類皆用之過多則困瀉止則復燥如
此數年遂畏藥性暴急不服但卧病待盡兩手脉息
俱滑實有力以大承氣湯下之繼服神功丸麻仁丸
等藥使食菠薐菜及猪羊血作羹百餘日充肥親知
駭之粗工不知燥分四種燥於外則皮膚皺揭燥于
中則精血枯涸燥于上則咽鼻焦乾燥于下則便溺

結秘夫燥之為病是陽明化也水液寒少故如此然
可下之當擇之巴豆可以下寒甘遂芫花可以下濕
大黃朴硝可以下燥內經曰辛以潤之鹹以軟之周
禮曰以滑養竅

龔子才治一男子年六十七因怒左邊上中下三塊時
動而脹痛揉之則散去心痞作嘈食胃口覺澁夜臥
不寧小便澁大便八日不通一醫以大承氣湯一醫
以化滯丸一用猪膽導法一用蜜導俱不效診之六

脉弦數有力此血不足氣有餘積滯壅實大黃末三錢皮硝五錢熱燒酒調服下黑糞如石數十枚如前再進下糞彈盆許遂安後以四物湯加桃仁紅花酒蒸大黃黃連梔子三稜莪朮枳殼青皮木通甘草十數劑而愈

李時珍治一宗室年幾六十平生苦腸結病旬日一行甚于生產服養血潤燥藥則泥隔不快服硝黃通利藥則若罔知如此三十餘年矣診其人體肥膏粱而

多憂鬱日吐酸痰椀餘乃寬又多火病此乃三焦之氣壅滯有升無降津液皆化為痰飲不能下滋腸腑非血燥比也潤劑留滯硝黃徒入血分不能通氣俱為痰阻故無效也乃用牽牛末卓角膏丸與服即便利自是但覺腸結一服就順亦不妨食且復精爽蓋牽牛能走氣分通三焦氣順則痰逐飲消上下通快

矣

本草
綱目

外甥柳喬素多酒色病下極脹痛二便不通不能坐卧

立哭呻吟者晝夜醫用通利藥不效遣人叩李李思
此乃濕熱之邪在精道壅脹隧路病在二陰之間故
前阻小便後阻大便病不在大腸膀胱也乃用棟實
茴香穿山甲諸藥入牽牛加倍水煎服一服而減三
服而平

全上

張景岳治一壯年素好火酒適夏月醉則露卧不畏風
寒此其食性臟氣皆有大過人者因致熱結三焦二
便俱閉先以大承氣湯用大黃五七錢如石投水又

用神祐丸及導法俱不能通且前後俱閉危益甚遂
仍以大承氣湯加生黃二兩芒硝三錢又加牙皂二
錢煎服黃昏進藥四鼓始通大便通而後小便漸利
此所謂盤根錯節有非斧斤不可者若優柔不斷鮮
不害矣

朱翰林太夫人年近七旬偶因一跌即致寒熱醫與滋
陰清火勢轉甚診之六脉無力雖頭面上身有熱而
口不渴且足冷過股曰此陰虛受邪非跌之為實陰

症也遂以理陰煎加人參柴胡二劑而熱退日進粥
二三椀已而大便半月不通腹且漸脹咸以燥結為
火欲復用涼劑張不可謂若再用清火其原必敗不
可為矣經曰腎惡燥急食辛以潤之正此謂也乃以
前藥更加薑附倍用人參當歸數劑而便通腹即退
日就瘥

此實風秘之類
未可歸功薑附

按此症乃陰虛陽越亦類中之輕者一跌而病良
有以也不知陰症二字何以插入其生平見解大

可知矣

李士才治蔣少宰服五加皮酒遂患大便秘結四日以
來腹中脹悶服大黃一錢通後復結李曰腎氣衰少
津液不充誤行疎利

疎字不安

是助其火矣以六味九料

煎成加人乳一鍾白蜜五錢二劑後即通十日而愈
顧文學素有風痰大便秘治風須治血乃大法也用十
全大補湯加秦艽麻仁杏仁防風煨皂角仁半月而
效三月以後永不再發

此亦風秘之候

馮楚瞻治崔姓人六脉沈微身熱四肢厥冷發狂譫語

連夜不寐口渴浩飲二便俱秘

絕似陽明熱症而斷為陰伏逼陽乃舍症

從脉之治

此陰伏於內逼陽於外因津液不行故小便秘

而口乾渴非實熱也因穀食久虛故大便虛秘不通
非燥結也若不急為斂納則真陰真陽並竭矣乃用
熟地麥冬以壯金水炒白朮以托住中氣牛膝五味
以下趨藏斂製附子以引火歸源另重煎人參沖服
不三劑狂定神清思食而愈

按此亦陰虛陽越之病甚則為類中其治法亦大醇而小疵耳至云陰伏于內逼陽于外亦與景岳案中謂為陰症同一模糊也此二案不入類中門者以世俗惟以二便為急且風秘一條人不講也胡念菴治陳鹽商年七十六矣春時患中風脫症重劑參附二百餘帖獲痊至十月大便秘結不行日登廁數十次冷汗大出面青肢厥醫用滋補劑入生大黃三錢胡深以為不可戒之曰老年脫後幸參附救全

不能安養過于思慮以致津液枯竭傳送失宜何事
性急以速其變若一投大黃往而不返恐難收功矣
姑忍二三日勢當自解病者怪其遲緩口出怨咨之
辭次日不得已用人參二兩茯苓一兩當歸五錢松
柏仁各五錢附子三錢升麻四錢煎服外用綠礬一
斤入圓桶以滾水沖入扶坐其上一刻而通
按傷寒瘧利之後患秘結者皆由攻下散表失宜
所致究其由則皆血燥為病至若風秘一條其病

醫林
總目

本由燥火生風醫者昧于風字動用風藥死者已
矣其存者亦必貽後患然此尚其輕者也

張路玉治楊松齡夏月感冒服發散十餘劑二便俱閉
一醫用硝黃下之少腹左畔遂脹起如墩不赤不熱
有時唧唧作聲瘍醫以敷藥治其外以解毒利水藥
治其內藥未進而躁擾不寧診之六脉緊細而駛此
過汗津液大傷又與苦寒攻裏致陰邪內結膀胱不
化溺積不通法在不救幸胃氣有權形神未槁尚能

少進粥糜姑許以治因與濟生腎氣大劑煎成入有
嘴壺托起其項徐徐仰灌升許頻令轉側以驚翎探
吐即時洩便如注少腹頓平更與十全大補調理而
安此症前後患者四五人或小淋瀝或遺溺不止或
形羸氣脫皆力辭不治

按此由感症混表混攻而成秘結收入此門以備
參酌

孫文垣治溫南溪內人居常大便秘結面赤不思飲食

頭時眩暈診之右關尺滑大有力此痰火症也用瓜
蒞四錢為君滑石三錢枳實二錢半夏一錢半為臣
蘿蔔子薑黃各一錢為佐兩帖愈矣又教以或遇大
便秘結每服當歸龍薈丸加牛膽南星一錢立愈
一人大便秘數日不通用商陸搗爛敷臍上立通

本草

綱目

一人大便秘久用烏柏木方停一寸劈破以水煎取半
盞服之立愈

陸養愚治關望亭年近古稀常患脇痛用行氣藥及當歸龍薈丸即愈後患便秘服潤腸丸便雖通而飲食減胸膈不舒有時溫溫作痛若數日不服又秘結矣或以高年血不足所致投以四物湯數劑并小便亦不通三日脹急殊甚密導熨劑百計不解脉之沈遲而弱詢其平日大便有欲解不解之狀及解又潤而不燥曰此非血秘乃氣虛不能傳送所致也用補中益氣湯少以木香白豆蔻佐之二劑而便俱通此後

常服一劑不惟無秘結之患且飲食倍增脇痛亦不作矣

陸祖愚治邱念招稟賦薄弱常有夢遺症愛食燥炒飯大便二三日一度忽受風寒仍喫燥飯且日進四餐旬日間飲食如舊而大便竟不行後復寒熱頭痛發黃發斑黃退而斑色純紅仍以涼解之劑煎送潤字丸二錢五分良久去燥矢七八塊斑消身微涼然胸口尚不可按再服涼解六劑便不行而小腹微滿或

謂病已月餘可以議下弗之聽仍用潤字丸二錢五分薑湯服少頃去大便七八塊而胸中如故令以前方日服一劑間三日投潤字丸二錢病至七十餘日服潤字丸計五兩胸膈猶未清然病久肌肉削盡沉常有遺症不宜再行消導矣枳實二錢山查二錢人參六分附子四分連進三劑遂大便日行一次人參漸加枳實漸減數劑後食進病起服參至半斤始得復元

丹溪治一婦人脾疼後患二便不通此是痰隔中焦氣聚上焦二陳加水通先服後吐渣再煎燒皂角灰為末粥清調下

一尼體厚病吐逆忽小便不利頭汗出立斃

薛立齋治儒者王錄之素痰甚導吐之後大便秘結頭暈眼花等症尺脉浮大按之則濡此腎氣虛而兼血虛也四物送六味四劑諸症悉退仍用前九月餘而康

食憲高如齋素唾痰服下痰藥痰去甚多大便秘結小便頻數頭暈眼花尺脉浮大按之如無謂腎家不能納氣歸源前藥復耗金水而甚用加減八味丸料煎服而愈

陳三農治中州王太學素多酒食病下極脹痛二便不通坐卧不能沈吟七日矣百般通利不應此濕熱之邪遏塞二陰壅脹隧路故前後不通病不在大腸膀胱也乃用韭菜子穿山甲茴香棟實各一錢五分入

牽牛頭末三錢水煎一服即減三服即愈乃知牽牛能達右腎命門走精隧故東垣用天真丹以牽牛鹽水炒黑入佐沈香官桂杜仲破故紙治下焦陽虛也

陳良甫曰一男子病風淫末疾或用快藥利之患肺痿咯膿血至大便不通而死惜哉

易思蘭治一儒者患便秘症初因小便時秘服五苓散八正散益元散俱不效一醫診得二尺俱無作陰虛水涸用八味丸日一服三日大便亦秘口渴咽乾煩

滿不睡用脾約丸潤腸丸小便日數十次惟點滴而已大便連秘十日腹滿難禁衆議竅自利果愈繼以調養失宜一月後其症復發梁以前方二劑服之亦令探吐不唯不效初止少腹脹悶吐後胸膈亦脹悶難堪矣六脉洪大而空馮曰前者神氣未衰今則汗多心跳精力甚疲必補中氣乃能升降運行仍令服前方二劑悶益甚則以人參一兩附子三錢濃煎溫服少頃自胸次以至小腹漉漉有聲小便連行而愈

信乎藥不執方也

吳浮先治曹庶常患小便不通多服分利之藥遺尿一夜不止既而仍復秘塞點滴不行此利藥太過腎氣虧極急用補中益氣湯送腎氣丸遂痊

黃履素曰予家有僕婦患小便不通之症時師藥以九節湯腹漸滿而終不通幾殆矣有草澤醫人以白蘿蔔子炒香白湯吞下數錢小便立通此予親見之者
孫文垣治袁洪溪以衝暑往來經畧政事致發熱燥渴

因過食水浸瓜果遂成泄瀉小水短少醫與胃苓湯
加利藥瀉止而大便燥結不堪乃用潤腸丸復瀉不
止又進前藥瀉止而小水失其常度臍下脹急立溺
則點滴不出卧則流滲不竭以頻取夜壺致通宵不
寐治半月精神削寢食廢診之兩寸短弱關緩大兩
尺洪大此餘暑未清素善飲濕熱流於下部也以益
元散三錢煎香薷湯服之畧無進退脉亦如昨再思
之此盖尿竅不對也膀胱者脬之室也脬中濕熱下

墜立便則竅不對小水因不得出卧則脬下墜而滲
出膀胱猶以竅不對涓涓流溢不能暢達故了而不
了也治惟提補上中二焦元急用三一承氣湯下之
服後微利隨秘又加小腹燒臍滿痛復用舟車丸遇
仙丹每空心一服日利三五次裏急後重下皆赤白
如此半月日夜呻吟惟進米飲及茶盃許診得兩寸
沈伏有力兩關洪緩無力兩尺不見曰關尺無恙病
在膈上此思慮勞神氣秘病也以越鞠湯投之服一

孟噉氣連出再一孟大小便若傾所下皆沈積之物
渾身稠汗因進薑湯一孟熟睡睡覺粥進二盞復診
脉平調理氣血而愈

立齋診職方陳義齋年逾六旬先因大便不通服內疏
等劑後飲食少思胸腹作脹兩脇作痛形體倦怠兩
尺浮大左關短澁右關弦澁時五月此乃命門火衰
不能生脾土而肺金又尅肝木決其金旺之際不起
後果然

萬密齋治汪玉虹大便不通服通幽湯潤腸丸俱不效
診其言微氣弱乃內傷症也氣口脈浮大而軟此氣
不運而血不潤氣血兩虛故也宜亟補之曰其如腹
脹何曰無慮但服補中益氣湯倍加當歸五日而愈
許學士治一人母年八十四忽爾腹痛頭疼惡心不食
召醫數十議皆用補脾進食治風清利頭目等藥數
日難愈全不入食其家憂惶許辨說前藥皆誤矣此
症正是老人風秘臟腑壅滯聚于胸中則腹脹惡心

不思飲食又上至于巔則頭痛神不清也若臟腑流暢諸疾悉去矣乃用紫蘇子大麻子各半合洗淨研細取汁一盞分二次煮粥兩啜而氣滯先下結糞如胡椒者十餘枚後漸得通利不用藥而愈矣

文潞公在北門日盛夏間苦大腑不調公隨行醫官李琬本衢州市戶公不獨終始涵容之又教以醫事公病泄利琬以言動搖之又求速效即以赤石脂龍骨乾薑等藥饋公公服之累日不大便其勢甚苦初虞

世共城來見公未坐定語及此事公又不喜服大黃藥虞世告曰此燥糞在直腸藥所不及請以蜜箭導之公以為然時七月中苦熱虞世冒汗為公作蜜箭是夕三用下結糞四五十枚大如胡桃色黑如橡栗公二三日間飲食已如故

良方

攢宮有一老人患風秘八九日不通有木匠授以此方只一服見效用不蛀卓角當中取一寸許去黑皮以沸湯半盞泡上用盞蓋定候通口服之先便少粥通

後即食

是齋方

繆仲淳治唐震山年七十餘便燥結胸中作悶曰此血

液枯槁之候用大肉蓯蓉三兩

白酒浸洗去鱗甲切片

白湯三

碗煎一碗頓飲飲竟大便通胸中快然偶一醫問疾

曰此劫藥也當調補脾胃為主易以白朮厚朴茯苓

陳皮病如故唐翁曰誤矣仍飲前藥立解高存之聞

而叩其故繆曰肉蓯蓉峻補精血驟用之反動大便

藥性載甚明也

廣筆記

張選卿治大便不通屢驗方硃砂

研如飛
麤五錢

真蘆薈

研細
七錢

滴好酒少許和丸每服一錢二分好酒吞下朝服暮

通暮服朝通須天晴時修合為妙

全上

劉雲密治一老人因冒雨感寒未經發汗至春初內熱
煩燥胸膈緊滿十日不大便用清解二劑入口即吐
其半加熟大黃利下之咽即吐去殆盡蓋因痰熱凝
結胸膈以治血分者反拒而不受也因用牽牛大黃
丸緩緩服之而大便通後乃服清熱化痰藥十餘劑

而漸安則較瀕湖所說老婦腸結症又進一劑解矣
吳橋治張邦達謝邑歸年踰艾矣其貌壯碩如廁率易
行偶以信宿夢遺早呼旨酒進人膏二匕既而大便
稍實無他端張所善者已深以為誤飲而釀內熱不
急下且虞有他既飲大黃湯不為動猶以為熱甚至
于再三腹脹膨脝駸駸石矣旬日尸寢如死昏瞋不
食不言橋診之脉隱隱將絕橋曰司啓閉主二溲脾
居中制之必關脾而後轉運長者故中枵而下瀉誤

以悍劑伐之脉有死徵不可為矣衆曰否即中氣乏
遇下且如建瓴何不為動橋曰公等信知脾虛不任
寒涼不知脾斃則寒涼無所用矣諸子跽曰誠得一
劑藉手庶母愆于人子之心曰第進獨參湯當下其下
亦薄于治無裨既得劑則腸鳴而溲腹脹者虧三之
一張乃張目問狀人人以為更生諸子問曰大黃不
行而人參行何說橋曰否中權廢矣即前茅安所受命
哉補中而建招搖推堅者始為之用此亦人參用大


黃爾非自用而能下之顧病少間而脉不歸終于不治深且復至將攘為已功大詬諸子曰爾曹以不治治家丈人無人子禮茲更一下而起復何待乎橋故避深度復爭之無益適諸子問可否乃徐應曰等死爾下則死疾不下則死遲公等自裁橋何敢與深詬愈急卒復下之不旋踵死矣

太函集

王生病發熱頭痛腹脹甚醫為之解散熱退而痛如故且不得前後溲又以大黃通之大溲稍行小溲赤澁

脹痛特甚仍以為熱結將復下之橋診曰病得之三
勞倦且內復食冷爾內則損腎勞倦食冷則損脾腎
主大小溲腎損則不能轉輸故作濕熱而為脹滿藉
令亟下則將亡陰脹滿有加矣危之道也王俯首叩
枕曰誠如公言三者皆如見遂投人參五苓散一服
得前溲再乃大通痛亦尋減病者求通後溲急橋曰
公六脉沈微且數必假信宿脾氣始回脾得主則濕
熱將自行毋欲速明日大溲自下調理月餘而愈

全上



續名醫類案卷二十六